

Biike ön Muasem 2008, Klaus Mungard

Üüs sölring Lön, dü best üüs helig, dü best üüs Ain, dü best üüs Lek. Din Wiis tö hualen sen wü welig!

Man hat kumt mi tö Tir sa fuar, üs dat di hiili Warel jen üp üüs Ailön ütbrede maat! Hat skiint mi dach sa, üs dat forsaacht uur, ark Quadratmeter fan üüs helig ual Lön tö Jil tö maakin, ön dit üs Taustuuningener da förter forhüürt uur. En Hotels, wat ek muar gurter becht uur ken.

Ön diarme giar dach uk wes üüs Lek üp Rais, wan wü Sölring diar nönt töögen maaki.

Dach Lek mut em jen langsens uk man fortiini. en dit giar bluat, wan wü Sölring diarfuur Sörig drai, dat di Terper jung Sölring Familjen help, en Hüs tö bechen, of Uunrüm ütweechet, di jam uk bitaali ken.

Wü forsjuk tö Tiir, jir ön Muasem weder Grünsteken fuar Sölring üs Bechlön iindrai tö leten.

Skul dit slaagi, her wü jir 40 Hüsing muar, wat me Muasemböör biuunet wiar! Sa haa wü üüs dit tömenst üttaacht. Da hat es nü sa fiir, dat di Pröst, di Kram, di Post en di Spaarkass sik altermaal aur tö hoog Personalkosten en sa förter ek muar aur Weeter hual ken. En diarfuur gair hat nü uk üp di Gimiindi luas, aur dat ja uk wes tö fuul Liren haa, danen tö fuul Jil kosti, sair om tömenst ön Kiel!

Tö di naist Waalen uur nü ja uk wes aur di Fusion me Weesterlön ofstemmet, om Jil ön di Verwaltung tö spaarin.

Üüs Lek es diarme dach wes uk ek muar dön, aur Muasem salev tö bistemmin.

Al sent Jaarhönerten waar tö Biikibronen di Thing ofhölen en diaraur bereren, hurdeling dit me üüs Terp förter gung skel, ön wat dir Jaar aur jit sa bitaacht uur mut. Di hiili Jaar aur kum ek sa maning Muasemböör töhop, üs jir tö üüs Biiki. En diaraur ken em dach wes bi en Kop Puns en en litj Snak Taachten diaraur haa, wat me üüs Sölring Lön uur. Teenk i, dat jam ön Weesten Taachten aur üüs Sörigen maaki, hurdeling dit me Muasem förter giar?

En nü:

Biiki fan Söl, helig ual jöl, flami aap, skiin aur üüs Lön, sa üs altert heest dön.